

UKA 2015-21 (qaleralinnut akitsuut) pillugu Aningaasaqarnermut Ataatsimiititaliaq peqatigalugu isumasioqatigiinnermut oqaaseqaatit

1) Iluanaarutit 20 mio. kr.-t katersorneqarnissaannut suna tunuliaqutaava?

Akissut:

2016-imut Aningaasanut inatsisissap suliarineqarneranut atatillugu akitsuutit ataatsimoortut saqqummiunneqarmata arlalinnik isornartorsiusoqarpoq, ingammik neqinut nukissiuutinullu akitsuutinut.

Taamaattumik naalackersuisooqatigiit akornanni siullertut, qaleralinnut akitsuummik imaqartumik, isumaqatigiissutissamik siunnersuummik suliaqartoqarpoq.

Aningaasat 20 mio. kr.-t Nunatta Karsiata isertitassatut pisariaqartitaanit sinneruttunit aalajangerneqarput, allannguutissatut siunnersuutit aappassaaneerineqarnerani akileraartarnermut akitsuusiisarnermullu suliaqarfimmit isertitassatut ilimagisat nutaat annertunerusullu ilanngunneqarnerata kingorna.

2) Aalisartut eqqugaassapput; qanoq?

Akissut:

Ullumikkut sinerissap qanittuani qaleralinnik aalisarnerup imminut akilersinnaanera annertoourujussuuvoq. Qaleralinnik tunisinermi 2014-imi akiusoq agguaqatigiissillugu kg.-imut 16,7 kr.-uvoq. Aalisartut 2014-imi tunisinermi aningaasartuutigisartagaat agguaqatigiissillugu kg.-imut 30 pct.-it missaannut kisinneqarsimavoq, tamanna kg.-mut 5 kr.-iuvoq. Taamaasilluni 2014-imut naleqqiullugu qaleralinnik tunisinermi kg.-imut iluanaarut 11,7 kr.-t missaanniippoq. Tamanna 70 pct.-imik iluanaaruteqarnerunervevoq. Akitsuummik kg.-mut agguaqatigiissillugu 0,80 kr.-mik eqqussisoqarpat iluanaaruteqaatit kg.-imut 10,9 kr.-nut appassapput, iluanaaruteqaatillu 64 pct.-it missaannut appassallutik. Akit apeqqutaallutik avataani aalisarnermi iluanaarutaasartut agguaqatigiissillugit 20-30 pct.-iusarsimapput.

Isumaqarpoq tunisinermi akigititaq 2014-imitut iinnassappat akitsuut nutaaq eqqunneqaraluarpallunniit ilimagineqarpoq imminut akilersinnaassuseq 2016-imi suli annertussasoq.

3) Taakku 20 mio. kr.-t akileraaruteqaataasussaanerisa akileraarutinut suna sunniutigissavaa?

Akissut:

Qaleralinnut akitsuutissap nutaap iluanaarutissartaa tamakkiisoq 20 mio. kr.-nut missingersuutigineqarpoq. Akitsuutit akileraaruteqaataasussaapput taamaasilluni ilanngaaseereerluni iluanaarutissat 12 mio. kr.-iussasut naatsorsuutigineqarpoq. Akitsuutit eqqunneqarnissaanni inuussutissarsiummit annikinnerusumik akileraaruteqartoqarnissaa eqqarsaatigineqarpoq.

Akitsuutit akileraaruteqaataasussaannerat suliaqarfinit allanit allaanerutitsingilaq, inuussutissarsiorfinni isertitanit akileraarusigassaasunit aningaasartuutimikkut ilanngaasiiffisaramikkit.

4) Siunnersuummi inaarutaasumi (allannguutissatut siunnersuut) akitsuutit qaffasissusaat qanoq katiterneqassappat? Sumik qanorlu akitsuutinik piumasaqassappat? Ilaatigut eqqaaneqarpoq 5%-it taakkua kilomullu aki 2,5 kr.-iusoq allaasut. Tamatumunnga tunngatillugu inuussutissarsiorfik 50 øre-mik akikilliliiffigineqarpa?

Akissut:

Allannguutissatut siunnersuummi sinerissap qanittuani qaleralinniarnemit tunisinermi nalingata 5 pct.-ia akitsuutaavoq (iluanaarutitut aaqqissuussat tunisinermullu atatillugu akissarsiat allat ilanngullugit). Avataani qaleralinnik aalisarnermi akitsuut akilerneqartussa, toqqaannartumik annissuinerannit kisimi allineqassanngilaq; aammali tunisinerannit. Aalajangerneqarpoq avataani aalisarnermi akitsuut tamakkiisoq taamaaginnassasoq, taamaattumik akitsuutip nalinga 3 kr.-mit 2,5-imut appartinneqarpoq.

5) Ataatsimiititaliap tusarniaanermi akissutit qinnutigai!

Akissut:

Tusarniaanermi akissutit email-ikkut nassiunneqareerput.

6) Siunnersuutip qulequtaa tulluussarneqassaaq?

Akissut:

Qulequtaq allanngortinneqarpoq, naleqq. imm. 1 naqqiummi 22. oktober 2015-imeersumi.

Inatsisip qulequtaa ima oqaasertaliorneqarpoq:

” Kalaallit Nunaata kangiani aalisarnermi qaleralinnut aamma aalisakkat ikerinnarsiortut ilaannut akitsuutit pillugit Inatsisartut inatsisaat.”